

*Ja u prvi mah nisam shvatio na šta misli i upitao sam na šta se odnosi pitanje - odgovorio je: „Pa na pripreme Olimpijade.” Rekao sam mu da ga upravo i o tome želimo detaljnije obavijestiti.*

*Titu smo izložili našu ocjenu međunarodnog značaja odluke da se Olimpijada povjeri Jugoslaviji; da je to izraz povjerenja u našu unutrašnju stabilnost, sigurnost i sposobnost da organizujemo takav poduhvat; da će višegodišnje pripreme i samo održavanje Olimpijade doprinostiti međunarodnoj afirmaciji Jugoslavije; da je Olimpijadu dobila Jugoslavija i da želimo i nastojimo da ona bude jugoslovenski poduhvat; da Olimpijadu smatramo razvojnim, a ne potrošačkim projektom i da ćemo je pripremiti kao projekat razvoja zimskog turizma i uspostavljanja poslovnih aranžmana sa svijetom; da insistiramo na racionalnim pripremama; koristićemo, prije svega, sve postojeće potencijale, gradićemo ono što će donositi trajne koristi i odlučno se suprotstaviti investicijama i potrošačkim apetitima; koristićemo maksimalno prihode koje možemo ostvariti ustupanjem prava stranim partnerima, međunarodnim i domaćim marketingom, zatim sredstva samodoprinosu građana BiH, sredstva Republike i to na ograničenu sumu udruženih sredstava republika, pokrajina i Federacije i sl. Rekao sam da, nažalost, ima u zemlji neshvatanja velikog međunarodnog značaja što nam je povjereno organizovanje Olimpijade i njenog razvojnog značaja, pa da čak ima i ideja da se odustane. Tito je reagovao riječima: „Jeste, one i do mene dolaze.”*

*Nakon svega što smo mu izložili o Olimpijadi, Tito je reagovao pohvalno, podržao je našu orijentaciju riječima: “Samo nastavite tako!” i posebno naš napor da se dogovorom u zemlji ujedinjujemo za ovaj poduhvat.*

*(Iz memoarskih zabilješki Raifa Dizdarevića „Zimska olimpijada u Sarajevu - od oduševljenja, preko ozbiljnih kontroverzi, do velikog uspjeha”).*